

29 JAN 2002

PELAJAR MERUPAKAN KESINAMBUNGAN PERJUANGAN PEMIMPIN NEGARA

BANGI, 29 Jan (Bernama) -- Menteri Pertahanan Datuk Seri Najib Tun Razak berkata golongan pelajar perlu menyiapkan diri untuk meneruskan perjuangan yang diasaskan oleh pemimpin negara.

Katanya untuk perjuangan pemimpin terdahulu dan yang ada sekarang, pelajar perlu bersama-sama menghayati erti perjuangan, bersatupadu dan memperkukuhkan perpaduan antara kaum.

"Cara mengenang dan menghayati jasa pemimpin bukan hanya dengan mengadakan majlis semata-mata, tetapi pelajar perlu tahu bersyukur, mengenang jasa dan berterima kasih kepada mereka," katanya semasa merasmikan Malam Anugerah Tahunan Kolej Ibu Zain, Universiti Kebangsaan Malaysia (UKM) di sini malam ini.

Majlis itu diadakan sempena 26 tahun pemergian bekas Perdana Menteri Allahyarham Tun Abdul Razak, Canselor pertama UKM. Tun Razak meninggal dunia pada 14 Jan, 1976.

Najib berkata kepimpinan Perdana Menteri Datuk Seri Dr Mahathir Mohamad menyambung perjuangan bangsa yang diasaskan pemimpin terdahulu dan Malaysia kini muncul sebagai model kepada negara yang sedang membangun.

Turut hadir pada majlis itu Setiausaha Parlimen Kementerian Penerangan Datuk Zainuddin Maidin.

-- BERNAMA
MUN MAM FAZ